



CUMÜN DA SENT



Il mas-chalch da Sent

Publicaziuns officialas. Cumpara seguond bsögn.

2012-2014

no. 12

7554 Sent, 25 october 2012 / bmr

Plazza da giarsunadi sco bos-cher

Il Cumün da Sent spordscha a partir dal mais lügl 2013 üna plazza da giarsunadi sco bos-cher.

Annunzcha: InteressentAs per quella plazza da giarsunadi s'annunzchan in scrit fin il plü tard als **5 november 2012** al

Cumün da Sent
Administraziun forestala
7554 Sent

A l'annunzcha sun d'agiundscher il cuors da vita in fuorma da raquint, fotografia da pass e copchas dals attestats (almain dal s-chalin ot). Attest da las eivnas d'insaj.

Persuna da contact: Sar Mario Riatsch, silvicultur, tel.: 079 413 05 66 / mail: afsent@bluewin.ch

Cussagl cumünal Sent

Promoziun dal sport d'inviern

Eir quist on ha il Cumün da Sent decis da tour part a la sporta cumünaivla dals cumüns e da las Penderas Motta Naluns chi pussibiltescha a scolars e scolaras da retrar cartas per la stagiun d'inviern 2012/2013 per ün predsch fich favuraivel. Ils cumüns chi piglian part a quist'acziun surpiglian insembel cun las Penderas Motta Naluns üna gronda part dals cuosts da quistas cartas da stagiun. Las seguaintas annadas pon retrar la carta da stagiun pels seguaints predschs:

Solaras e scolars da las annadas 1997 – 2006 frs. 50.-
Solaras e scolars da las annadas 1996 e plü vegls (be obligatorium da scoula) frs. 162.-
Pels uffants cun l'annada 2007 e plü guivens es l'adöver dals indrizs gratuit!

Ils frs. 5.- per las KeyCards nu sun cumprais in quists predschs. Las Keycards da l'on passà pon però gnir rechargiadas per quist on.

Atenziun! Ils predschs comunicats survart valan be per cartas da stagiun chi vegnan retrattas fin il plü tard als **30 november 2012**.

Las datas da la prevendita vegnan dattas cuntschaintas da las Penderas Motta Naluns.

Il Cussagl cumünal

Di da refuorma e di da schoppa: 4 november 2012

11.00 predgia (rumantsch)

12.00 giantar cumünaivel in Chasa Misoch, l' invid vain dals confirmands e dals preparands. Il rechav va per ün' ouvra sociala o charitativa. Per realisar quist arrandschamaint ed eir per otras occasiuns a favur da la cumünanza tscherchain nus agüdontas ed agüdonts, Chi chi ha interess, vögla e peda po s' annunzchar pro Barbla Buchli, tel. 081 864 02 78. Grazcha fich per Vossa bainvuglientscha.

La pravenda

Predgina

Als 8 november 2012 da las 17.00 – 18.00 in chasa da pravenda mincha gövgia fin als 6 december 2012. Per tuot ils uffants chi as laschan amo jent fascinar dad istorgias d' Advent e da preparaziuns per Nadal. Darcheu insembel cun scolars plü gronds dal s-chalin ot.

La pravenda

Invid cumünaivel

Ils scolars da la 5 - avla classa sco eir il consistori invidan ad üna davomezdi da cumpagnia a giovar. No giovain lotto ed oters gös. Id es eir alch lectüra cun üna buna marena. Tuots sun amiaivelmaing invidads als 22 november 2012 a las 13.30 cumanzaina in chasa Misoc. Sperain sün üna gronda cumpagnia.

Ils scolars e' consistori

Dumengia dals morts

Als 25 november 2012 a las 10.00 cult divin meditativ in memoria dals trapassats e dals relaschats. Cun flöta da pan. Collecta a favur da la società accumpagnar a muribunds.

La pravenda

Il bazar da la società da duonnas

ha lö als **18 november 2012 a las 13.30 in chasa cumünala**. No vain fat bleras lavurs da man. Natüralmaing daja ün' ingiavinera ed üna stüva da café cun bunas tuortas e panins. No lain far attent, cha no fain eir stinvs e pullovers sün postaziun.

Giiven e vegl es amiaivelmaing invidà. Grazcha fich ouravant per vos sustegn e per vossa numerusa cumparsa.

Ün grond ingrazchamaint a tuot quels chi han sustgnü a nossa società cun üna contribuziun annuala.

La società da duonnas

Advent pels attempats

Eir quist on organisescha la società da duonnas ün inscunter d'Advent **cun giantar** per quellas persunas da las annadas 1942 e plü veglias (da 70 amunt).

La data es gnüda fixada sün **dumengia, 9 december 2012**, a las **12.00** illa chasa Misoc.

l'ns fess grond plaschair scha tuot quellas persunas gnissan a nos giantar.

Annunzchas piglia incunter Annatöna Pult, tel. 081 864 86 82 opür Vreni Buchli tel. 081 864 06 77, **a partir da subit**.

La società da duonnas

Da dar a fit a Sent

A partir dals 1. schner 2013 ün' abitaziun da 4 ½ stanzas i'l plan terrain cun piazza per tschantar our' in üert. Cun maschina da lavar e tumbler. Fit al mais fr. 900.--, cuosts supplementars fr. 40.-- (aquint per aua), piazza da parcar fr. 50.--. Annunzchas pro duonna Annina Schweizer-Pua, tel. 081 864 96 64.

Annina Schweizer-Pua

Tscherchè

No tscherchain üna duonna chi chüra e cuschina per nossa mamma. 3 jadas per 2 uras, in tuot 6 uras al di. Annunzchar pro la famiglia Vital 078 825 35 85.

Gesucht

Wir suchen eine Person, die unsere Mutter pflegt und für sie kocht. 3 mal 2 Stunden, insgesamt 6 Stunden pro Tag. Bitte bei Familie Vital melden 078 825 35 85.

Famiglia Vital

Tscherchè a Sent

2 giats, 2 - 3 asens ed üna doctressa tscherchan chasa cun stalla e pajais per viver, lavurar e giodair. Gugent üna chasa veglia chi's po renovar. Annunzchas suot: ruth.bayerl@rega.ch, ruth.bayerl@cseb.ch o 081 861 10 26.

Gesucht in Sent

2 Katzen, 2 - 3 Esel und 1 Ärztin suchen ein Haus zum Kaufen, mit Stall und Umschwung zum Leben, Arbeiten und Hobby. Gerne altes, renovationsbedürftiges, schönes Häuschen! Ich freue mich über ihre Nachricht. ruth.bayerl@rega.ch, ruth.bayerl@cseb.ch oder 081 861 10 26.

Ruth Beyerl

Püschain per duonnas cun referat

In sonda, ils 17 november 2012 ha lö per la 10avla jada il püschain per duonnas a Scuol. Davo ün bun püschain accumpognà cun chant da duonna Claudia Schäfli referischa duonna Ruth Spadin-Gygax davart il tema: „La pussanza dals impissamaints.“

Ruth Spadin-Gygax es nada dal 1960. Ella viva cun seis hom Silvio a Thayngen SH. Insembel han els quatter uffants ed eir fingià trais abiadis. Daspö passa 30 ons lavura duonna Ruth Spadin-Gygax sco pastura e referenta illa lavur per duonnas.

Ils impissamaints han üna forza e pussanza enorma ed influenzeschan noss sentimaints fich ferm. Uschè sco cha nus pensain ans sentina. Impissamaints positivs sco eir negativs han lur effet sün nossas vitas. Il referat dess güdar ad ir intuorn plü bain cul agen muond da nos impissamaints.

Al püschain chi ha lö da las 08.30 fin las 11.00 illa sala polivalenta da la Chasa Puntota a Scuol sun invidadas duonnas da minch'età. Pels uffants es organisà ün servezzan da chüra cun üna pitschna marena.

Organisà vain l'arrandschamaint da differentas duonnas da las baselgias naziunalas e libras. Annunzchas piglia jent incunter fin venderdi, ils 16 november 2012 las 14.00, duonna Jolanda Thanei, telefon 081 858 59 64 o 076 472 40 73. Cuosts fr. 18.-/ persuna.

Società dal püschain da duonnas

“GA-per cumüns” – Adattamaint dal predsch

Per promover il trafic public, dà il Cumün a nossa populaziun eir dal 2013 la pussibilità da cumprar bigliets favuraivels, culs quals i's po viagar in tuot la Svizra cun tren, posta, barcha, tram e bus ün di a la lunga. Il bigliet es datà e vaglia be per quel di. **Per mincha di es avantman be ün bigliet.** Ils bigliets sun valabels per la 2. classa tenor las prescripziuns dals abunamaints generalis (GA).

Interessents pon cumprar opür reservar il bigliet plü bod pussibel pro'l büro cumünal, **tel. 081 / 861 20 60.** Ils bigliets pon gnir retrats dürant ils uraris da fanestrigl. **La reservaziun dal bigliet es impegnativa, uschè cha bigliets reservats ston in mincha cas gnir pajats.** Bigliets reservats e na retrats vegnan miss in quint.

La SBB dozza il predsch uschè cha'l cumün es sforzà da dozzar il predsch per bigliet **a partir dals 1. schner 2013 sün frs. 43.50.**

Chascha cumünala

Reavertüra – Sport Champatsch

La butia Sport Champatsch es darcheu averta davent dals:

3 november 2012 da las 9.00 – 11.00 e da las 15.00 – 17.00,
dumengia serrà.

A partir dals 15 december 2012 da las 8.00 – 12.00 e da las 15.00 – 18.00
dumengia 8.30 – 10.00 e da las 16.00 – 18.00

No ans allegrain sün vossa visita.

Team Sport Champatsch

Ultim avis – Leger giò l'ura da l'aua

Per simplifichar la lavur da leger giò l'ura da l'aua, dà il Cumün a mincha possessur da chasa la pussibilità da leger giò svesa l'ura da l'aua e d'indichar il stadi actual al büro cumünal fin il plü tard ils **2 november 2012.** Il Cumün as resalva il dret da far controllas da las indicaziuns.

Tagliar

Indicaziun – ura da l'aua 2012

Stadi da l'ura da l'aua: als

Chasa no. Possessur:

Schef d'aua e chnalisaziun

Transit d'inviern in Val Sinestra

A regard il transit d'inviern in Val Sinestra vain praticità sco d'ürant ils ons passats, in rondond attent sül scumond da transit dals 27 december 1978 dal Cussagl cumünal e sül decret dal Departamaint da güstizia e pulizia chantunal dals 1. favrer 1979.

Scumond

Dals 1. november fin als 30 avrigl esa scumandà da transir cun veiculs a motor sülla via Sent – Sinestra. Il scumond vala davent da l'ur dal god Vaschnuogls/Vita-Parcours fin pro'l Kurhaus Val Sinestra. Surpassamaints da quist scumond vegnan chastiat in basa als artichels 20 e 30 da la ledscha stradala. Quist scumond es gnü publichà i'l Fögl uffizial dal chantun Grischun dals 16 favrer 1979.

- Il signal no. 2.01 "Scumond general per trafic cun veiculs a motor" es piazzà a l'ur dal god.
- Avant la Val Vallatscha es impü montada üna barriera.
- Üna barriera es a l'ur dal god.
- In cas da privel da lavinias sun da resguardar las directivas e masüras dal servezzan da lavinias dal cumün da Sent.

Per traffichar faja dabsögn d'ün permiss special dal cumün. **(La vignetta da vias champestras dal cumün da Sent nu vaglia per transir in Val Sinestra)**. I vain montada suot il scumond general üna tabla "exclus cun permiss special dal Cumün". Permiss specials tschüffan be persunas chi han üna incumbenza i'l hotel Val Sinestra. Tuot ils transports dals giasts davent da Sent ston gnir surtuts da l' hotel. Surpassamaints dal **scumond general** vegnan chastiat.

Il Cussagl cumünal

Bainvgnü ed a revair

A revair e grazcha fich a Mario Zanetti

Mario Zanetti va, davo bundand 24 ons pro la Banca Chantunala a Sent, in sia meritada pensiun. El ha rapreschentà la Banca Chantunala a Sent tuot quists ons cun grond ingaschamaint. No ingrazchain per sia lavur e giavüschain tuot il bun per l'avegnir.

Bainvgnü ad Olga Häny-Pult

A partir dals 1. november 2012 es Olga Häny-Pult la persuna da contact illa Banca Chantunala a Sent. Fingì avant 17 ons ha ella lavurà pro nossa banca. Ils ultims mais s'ha ella preparada per quista sfida al sez regional a Scuol. No giavüschain a duonn'Olga blera satisfacziun illa nouva piazza.

Nouvas uras d'avertüra a partir dals 1. november 2012 a Sent:

lündeschdi e mardi:	08.30 h – 11.00 h	15.00 h – 17.30 h
marcurdi:	serrà tuottadi	
gövgia e venderdi:	08.30 h – 11.00 h	15.00 h – 17.30 h

Crescher cumünaivelmaing



**Banca Chantunala
Grischuna**